

Na osnovu člana 17. Zakona o Vijeću ministara Bosne i Hercegovine („Službeni glasnik Bosne i Hercegovine“, br. 30/03, 42/03, 81/06, 94/07 i 24/08), člana 54. stava (1) tačke b) i člana 56. Poslovnika o radu Vijeća ministara Bosne i Hercegovine („Službeni glasnik BiH“, broj 22/03) Vijeće ministara Bosne i Hercegovine na 14. sjednici, održanoj 7. 6. 2023. godine, pod tačkom 20, donijelo je

## ZAKLJUČAK

1. Vijeće ministara upoznalo s Godišnjim konsolidiranim izvještajem interne revizije za 2022. godinu te s tim u vezi zaključilo:
  - zadužuju se institucije Bosne i Hercegovine da realiziraju preporuke iz Godišnjeg konsolidiranog izvještaja interne revizije za 2022. godinu;
  - zadužuju se rukovodioci jedinica interne revizije i interni revizori u institucijama Bosne i Hercegovine da poslove u vezi s vršenjem funkcije interne revizije i izvještavanja obavljaju koristeći PIFC aplikaciju;
  - zadužuju se Ministarstvo finansija i trezora Bosne i Hercegovine i Centralna harmonizacijska jedinica Ministarstva finansija i trezora Bosne i Hercegovine da osiguraju potrebna finansijska sredstva za održavanje i daljnji razvoj PIFC aplikacije;
  - zadužuju se institucije Bosne i Hercegovine i zaposleni u jedinicama interne revizije da pruže svu neophodnu podršku Centralnoj harmonizacijskoj jedinici Ministarstva finansija i trezora Bosne i Hercegovine i Ministarstvu finansija i trezora Bosne i Hercegovine na održavanju i daljnjem razvoju PIFC aplikacije i njenih funkcija;
  - zadužuje se Centralna harmonizacijska jedinica Ministarstva finansija i trezora Bosne i Hercegovine da u okviru Godišnjeg konsolidiranog izvještaja izvršiti i o korištenju i primjeni PIFC aplikacije;
  - zadužuju se Ministarstvo finansija i trezora Bosne i Hercegovine, Ministarstvo odbrane Bosne i Hercegovine, Ministarstvo komunikacija i prometa Bosne i Hercegovine, Ministarstvo pravde Bosne i Hercegovine, Ministarstvo sigurnosti Bosne i Hercegovine i Direkcija za koordinaciju policijskih tijela Bosne i Hercegovine, kod kojih nisu u potpunosti kadrovski popunjene jedinice interne revizije, da zajedno s Ministarstvom finansija i trezora Bosne i Hercegovine osiguraju sredstva i provedu procedure zapošljavanja internih revizora u 2023. godini;
  - zadužuje se Agencija za pružanje usluga u zračnoj plovidbi - BHANSA, u okviru koje je propisana obaveza uspostavljanja jedinice interne revizije, da osigura potrebna sredstva i okonča procedure uspostavljanja jedinice interne revizije i zapošljavanja internih revizora u 2023. godini;

- zadužuju se jedinice interne revizije koje vrše funkciju interne revizije u više institucija da pravovremeno izrade i donesu, pored pojedinačnih strateških i godišnjih planova interne revizije, i konsolidirane strateške i godišnje planove interne revizije na nivou jedinice interne revizije, a u skladu s propisima i rokovima koje je odobrila Centralna harmonizacijska jedinica Ministarstva finansija i trezora Bosne i Hercegovine;
  - poziva se institucija Predsjedništva Bosne i Hercegovine da potpiše Povelju interne revizije i Sporazum o vršenju funkcije interne revizije s nadležnom jedinicom interne revizije;
  - zadužuju se rukovodioci institucija da, u saradnji s jedinicama interne revizije, poduzmu dodatne mjere na realizaciji nerealiziranih preporuka interne revizije;
  - zadužuju se rukovodioci jedinica interne revizije da uspostave neophodne procedure u okviru internog ocjenjivanja te da kontinuirano, za svaku godinu, izrađuju program osiguranja i unapređenja kvaliteta, provode stalni nadzor i periodična samoocjenjivanja, a da o rezultatima izvještavaju rukovodioca institucije i Centralnu harmonizacijsku jedinicu Ministarstva finansija i trezora Bosne i Hercegovine;
  - zadužuje se Ministarstvo finansija i trezora Bosne i Hercegovine da Godišnji konsolidirani izvještaj interne revizije za 2022. godinu dostavi Parlamentarnoj skupštini Bosne i Hercegovine.
2. Ovaj zaključak stupa na snagu danom donošenja i neće se objavljivati u „Službenom glasniku BiH“.

Broj: 05-07-1-1462-20/23  
Sarajevo, 7. 6. 2023. godine

M. P.

Predsjedavajuća  
Vijeća ministara Bosne i Hercegovine

